



**KENYATAAN MEDIA**

**KUALA LUMPUR (17 FEBRUARI 2021)** - Suruhanjaya Hak Asasi Manusia Malaysia (SUHAKAM) menyuarakan kebimbangannya berhubung laporan media baru-baru ini tentang penggunaan laman web pencarian teman tertentu oleh pelajar pusat pengajian tinggi untuk menawarkan diri jadi peneman bagi mendapatkan sokongan kewangan.

Dilaporkan bahawa terdapat peningkatan pendaftaran pengguna laman web tersebut sebanyak 40% berkemungkinan disebabkan oleh tekanan kewangan semasa pandemik COVID-19. Laman web ini atau aplikasi pencarian teman dalam talian yang serupa boleh mempromosi aktiviti eksplorasi seksual yang melanggar prinsip hak asasi manusia.

Keadaan ini amat membimbangkan dan sekiranya tiada mekanisma pemantauan yang sewajarnya oleh pihak berkuasa, ia boleh memberikan kesan buruk kepada generasi muda. SUHAKAM berpandangan bahawa generasi muda, tanpa mengira gender mereka seharusnya diberikan bantuan dan sokongan yang secukupnya bagi membolehkan mereka untuk meningkatkan potensi diri mereka sama ada dalam aspek pelajaran atau kehidupan profesional. Dalam perkara ini, SUHAKAM menyeru pihak berkuasa berkenaan untuk bekerjasama dengan pakar dan organisasi berkaitan bagi mengkaji punca mengapa perkara ini berleluasa dan mengenal pasti serta melaksanakan langkah-langkah untuk menangani isu ini dengan efektif.

SUHAKAM menyeru agar Kementerian berkaitan iaitu Kementerian Wanita, Keluarga dan Pembangunan Masyarakat dan Kementerian Komunikasi dan Multimedia menjalankan pemantauan berkala ke atas laman web pencarian teman sebegini atau aplikasi lain yang serupa. Adalah penting untuk memastikan keseimbangan antara hak untuk mendapatkan maklumat dan tapisan internet dalam mengawal apa yang boleh diakses, diterbitkan atau dilihat dalam laman web terutamanya apabila ia melibatkan generasi muda dan kanak-kanak.

SUHAKAM juga ingin mengingatkan ibu bapa dan penjaga untuk sentiasa memantau aktiviti internet anak-anak bagi melindungi mereka daripada mengakses laman web berunsur lucu yang berpotensi menjelaskan keselamatan dan kesejahteraan diri mereka.

**-TAMAT-**

**Suruhanjaya Hak Asasi Manusia Malaysia (SUHAKAM)**

**17 Februari 2021**

Pertanyaan Media: Sila hubungi Pn. Norashikin Hamzah melalui 03-2612 5687 / 019-621 5336 atau [shikin@suhakam.org.my](mailto:shikin@suhakam.org.my)